

**-UPRAVNI ODBOR-**

Broj: 02-20-2/23

Sarajevo, 06. 06. 2023. godine

Na osnovu člana 56. stav (1) i člana 59. stav (2) tačka a) Zakona o visokom obrazovanju („Službene novine Kantona Sarajevo“, broj 36/22), razmatrajući dostavljeni tekst Statuta Univerziteta u Sarajevu po okončanju procedure javne rasprave, Upravni odbor Univerziteta u Sarajevu je na 17. vanrednoj sjednici održanoj dana 06. 06. 2023. godine, dao *slijedeće*

M I Š L J E N J E

Daje se *pozitivno mišljenje* na Statut Univerziteta u Sarajevu, uz napomene i preporuke koje se daju s ciljem postizanja pozitivne ocjene usaglašenosti istog sa Zakonom o visokom obrazovanju („Službene novine Kantona Sarajevo“, broj 36/22), kako slijedi:

1. Oslonom na evropske pravne izvore preambulu Statuta Univerziteta u Sarajevu je neophodno jezički utemeljiti na sljedeći način:

„Senat Univerziteta u Sarajevu je

polazeći od činjenice da je Univerzitet u Sarajevu najstarija visokoškolska ustanova u Bosni i Hercegovini i *alma mater* svih njenih javnih univerziteta,

uzimajući u obzir da Univerzitet u Sarajevu nastavlja tradiciju visokog obrazovanja na tlu Bosne i Hercegovine započetu Gazi Husrev-begovom vakufnamom iz 1537. godine, te osnivanjem Šerijatsko-sudačke škole 1887. godine, Vrhbosanske katoličke teologije 1890. godine, podizanjem na rang visoke škole Sarajevsko-reljevske pravoslavne bogoslovije 1892. godine i osnivanjem Zemaljskog muzeja Bosne i Hercegovine kao istraživačke ustanove 1888. godine,

uvažavajući činjenicu da Univerzitet u Sarajevu nastavlja kontinuitet naučnog i obrazovnog rada u Bosni i Hercegovini i uključivanjem Fakulteta islamskih nauka i Katoličkog bogoslovnog fakulteta u punopravno članstvo kao i Gazi Husrev-begove biblioteke i Zemaljskog muzeja Bosne i Hercegovine i

slijedeći vrijednosti evropske baštine akademskih sloboda,

na osnovu člana 12. Okvirnog zakona o visokom obrazovanju („Službeni glasnik BiH“, broj 59/07 i 57/09), člana 56. Zakona o visokom obrazovanju („Službene novine Kantona Sarajevo“, broj 36/22), uz prethodno pribavljeno pozitivno mišljenje Upravnog odbora Univerziteta u

Sarajevu, broj 02-20-2/23 od 06. 06. 2023. godine i na osnovu pozitivne ocjene Ministarstva za nauku, visoko obrazovanje i mlade Kantona Sarajevo o saglasnosti Statuta Univerziteta u Sarajevu sa Zakonom o visokom obrazovanju („Službene novine Kantona Sarajevo“, broj 36/22), na sjednici održanoj 2023. godine *donio je*“

2. U članu 3. Statuta Univerziteta u Sarajevu, pri tome vezujući se za odredbu člana 76. stav (5) Zakona o visokom obrazovanju („Službene novine Kantona Sarajevo“, broj 36/22) – (dalje u tekstu: Zakon) predlaže se *dopuna* novog stava (3) koji glasi:

„Akademske titule, naučna/umjetnička i stručna zvanja na javnim ispravama koje izdaje Univerzitet navode se kako u muškom, tako i ženskom gramatičkom rodu.“

3. U članu 5. stavu (1) Statuta Univerziteta u Sarajevu, s ciljem navođenja potpunih informacija u vezi pravnog kontinuiteta Univerziteta u Sarajevu odnosno očuvanja istog, predlaže se *dopuna* podataka o Službenom listu Narodne Republike Bosne i Hercegovine u kojem je objavljen Zakon o Univerzitetu u Sarajevu, kako slijedi:

„(1) Skupština Narodne Republike Bosne i Hercegovine je dana 11. 09. 1949. godine donijela Zakon o Univerzitetu u Sarajevu („Službeni list Narodne Republike Bosne i Hercegovine“, broj 37/49) kojim se osniva Univerzitet u Sarajevu.“

4. U članu 16. Statuta Univerziteta u Sarajevu stavove (1) i (2) neophodno je *brisati*, budući da se istim regulira djelovanje Savjeta Ministarstva za visoko obrazovanje Kantona Sarajevo koje je već Zakonom utvrđeno. Dakle, ovim članom neophodno je samo bliže urediti djelovanje šest predstavnika iz naučnih i umjetničkih grupacija Univerziteta. S tim u vezi dosadašnji stav (3) sada glasi:

„(1) U Savjet Ministarstva za visoko obrazovanje Kantona Sarajevo ulazi i šest predstavnika iz naučnih i umjetničkih grupacija Univerziteta.“

Dosadašnji stavovi od (4) do (7) postaju stavovi od (2) do (5).

5. U članu 20. Statuta Univerziteta u Sarajevu kojim se regulira načelo ravnopravnost i zabrana diskriminacije, pri tome vezujući se za odredbu člana 55. stav (3) Zakona, predlaže se *dopuna* na način da se nakon stava (5) doda novi stav (6) koji glasi:

„(6) Zaštita od diskriminacije i uznemiravanja bliže se uređuje općim aktom Univerziteta.“

6. U članu 22. stav (1) Statuta Univerziteta u Sarajevu predlaže se *brisanje* riječi „unutrašnja“, na način da isti sada glasi:

„(1) Organizacija Univerziteta temelji se na načelima: decentralizirane unutrašnje organizacije, racionalizacije, funkcionalnosti, vertikalne i horizontalne povezanosti, te harmonizacije osnovnih elemenata unutrašnje organizacije i fleksibilnosti.“

7. U članu 27. stav (2) Statuta Univerziteta u Sarajevu koja glasi „Fakultet sporta i tjelesnog odgoja“ zamjenjuje se novim nazivom članice Univerziteta u Sarajevu koji sada glasi: „Kineziološki fakultet“. Pod izmijenjenom tačkom h) stavlja se napomena* i u fusnoti navodi sljedeće „Odlukom Senata Univerziteta u Sarajevu broj: 01-10-14/23 od 31. 05. 2023. godine usvojen je prijedlog Vijeća Univerzitet u Sarajevu - Fakulteta sporta i tjelesnog odgoja broj: 01-2034/23 od 12. 05. 2023. godine za izmjenu dosadašnjeg naziva naziv članice Univerzitet u Sarajevu – Fakultet sporta i tjelesnog odgoja u novi naziv „Univerzitet u Sarajevu - Kineziološki fakultet i isti je upućen Ministarstvu za nauku, visoko obrazovanje i mlade Kantona Sarajevo u skladu sa odredbom člana 52. Zakona o visokom obrazovanju („Službene novine Kantona Sarajevo“, broj: 36/22) na dalje postupanje.“

8. U članu 32. Statuta Univerziteta u Sarajevu predlaže se *dopuna* dosadašnjeg stava (1) na način da isti sada glasi:

„(1) Radi objedinjavanja rukovodnih, stručnih i izvršnih poslova u okviru obavljanja osnovnih, dopunskih, pratećih i stručnih djelatnosti na Univerzitetu organizira se Rektorat, kao posebna članica Univerziteta.“

U nastavku, u stavu (2) istog člana, u cilju harmonizacije naziva općih akta Univerziteta iz oblasti rada, predlaže se *izmjena* naziva općeg akata na način da se naziv „Pravilnik o radu“ zamjenjuje sa novim nazivom „Pravilnik o unutrašnjoj organizaciji i sistematizaciji radnih mjesta Rektorata“ i stav (2) sada glasi:

„(2) Putem Rektorata organizira se rad i rukovodi radom Univerziteta, što se preciznije uređuje Pravilnikom unutrašnjoj organizaciji i sistematizaciji radnih mjesta Rektorata u skladu sa važećim propisima.“

9. U članu 36. stavu (2) Statuta Univerziteta u Sarajevu, shodno naprijed navedenoj tački 8. ovog Mišljenja, predlaže se *izmjena* naziva općeg akata na način da se naziv „Pravilnik o radu“ zamjenjuje sa novim nazivom „Pravilnik o unutrašnjoj organizaciji i sistematizaciji radnih mjesta“ i stav (2) sada glasi:

„(2) Unutrašnja organizacija članica uređuje se pravilnicima o unutrašnjoj organizaciji i sistematizaciji radnih mjesta u skladu sa važećim propisima.“

10. U članu 37. Statuta Univerziteta u Sarajevu predlaže se *izmjena* dosadašnjeg stava (2) koji glasi: „Organizacija rada odsjeka i katedre uređuje se općim aktom Univerziteta“ na način da isti sada glasi:

„(2) Univerzitet donosi smjernice vezane za rad katedre i odsjeka.“

11. U članu 42. Statuta Univerziteta u Sarajevu stavu (1) nakon tačke h) dodaje se nova tačka „i) Ured za podršku i profesionalni razvoj osoblja Univerziteta“

U nastavku, dosadašnja tačka g) mijenja se novom tačkom h) i ista se dopunjuje na način da sada glasi: „usvaja godišnji izvještaj o radu sa finansijskim poslovanjem Univerziteta i dostavlja osnivaču na dalje postupanje“.

13. U članu 69. Statuta Univerziteta u Sarajevu, kojim se regulira suspenzija dekana/direktora članice, u cilju određivanja razlike između fakultativne i obavezne suspenzije predlažu se sljedeće izmjene:

Dosadašnji stav (2) ovog člana mijenja se na način da se tačke a) i c) *brišu* i isti sada glasi:
„(2) Dekan/direktor članice može biti suspendiran sa funkcije ako je protiv njega pokrenut postupak za utvrđivanje odgovornosti za težu povredu radnih obaveza odnosno teže prekršaje“

Dosadašnji stav (4) postaje stav (3) ovog člana mijenja se i sada glasi:
„(3) Suspenzija u iz stava (2) ovog člana traje najduže do okončanja postupka za utvrđivanje odgovornosti za teže povrede radnih obaveza/teže prekršaje.“

Dosadašnji stav (3) postaje stav (4) ovog člana mijenja se i sada glasi:
„(4) Rektor je obavezan suspendirati dekana/direktora članice zbog neprovođenja pravomoćnih sudskih odluka i u slučaju da mu je određena mjera pritvora.“

Dosadašnji stav (5) ovog člana mijenja se i sada glasi:
„(5) Ukoliko dekan/direktor članice u roku od 30 dana ne izvrši pravomoćnu sudsku odluku, rektor je ovlašten pokrenuti postupak prijevremenog razrješenja dekana odnosno direktora članice

14. U članu 75. Statuta Univerziteta u Sarajevu, kojim se regulira prijevremeno razrješenje rektora Univerziteta, predlaže se dopuna dosadašnja tačka f) na način da se dodaju riječi „i djelovanjem“ i ova tačka sada glasi:

„f) ako svojim ponašanjem i djelovanjem povrijedi ugled Univerziteta i funkciju rektora Univerziteta“

Navedeni prijedlog dopune je neophodno shodno primijeniti i na odredbu člana 120. stav (2) tačka f) u pogledu prijevremenog razrješenja dekana/direktora članice.

15. U članu 87. Statuta Univerziteta u Sarajevu kojim se utvrđuju druga stručna i savjetodavna tijela Univerziteta, predlaže se dopuna nove tačke c) koja glasi:

„c) Kolegij sekretara“

U nastavku, nakon člana 104. Statuta Univerziteta u Sarajevu predlaže se dopuna novog člana 105. kojim će se utvrditi nadležnosti Kolegija sekretara, koji glasi:

„Član 105.

(Kolegij sekretara)

- (1) Kolegij sekretara je savjetodavno stručno i pravno tijelo koje čine generalni sekretar Univerziteta i sekretari članica.
- (2) Kolegij sekretara saziva i njime predsjedava generalni sekretar Univerziteta.
- (3) Kolegij sekretara saziva se radi zajedničkog razmatranja stručnih pravnih pitanja iz područja djelokruga rada Univerziteta/članice, ujednačavanja primjene propisa i pojedinačnih akata tijela Univerziteta/članice, davanja mišljenja, kao i pripreme općih akata Univerziteta i članica i drugih relevantnih pitanja koja su od značaja za rad Univerziteta/članice.
- (4) Bliži djelokrug i način rada Kolegija sekretara uredit će se Poslovníkom o radu Kolegija sekretara.“

16. U članu 106. Statuta Univerziteta u Sarajevu predlaže se izmjena stava (2) na način da isti sada glasi:

„(2) Član akademskog/naučnoistraživačkog osoblja može ostvariti pravo na članstvo u okviru samo jednog vijeća članice.“

17. U članu 109. Statuta Univerziteta u Sarajevu, kojim se regulira nadležnost vijeća fakulteta/akademija nakon tačke b) dodaje se nova tačka c) koja glasi:

„c) utvrđuje prijedlog pravilnika o unutrašnjoj organizaciji sistematizaciji radnih mjesta“

Dosadašnja tačka c) postaje tačka d), mijenja se i sada glasi:

“d) donosi i druge opće akte članice u skladu sa općim aktima Univerziteta“

Navedeni prijedlog dopune je neophodno shodno primijeniti i na odredbu člana 111. u pogledu nadležnosti vijeća instituta.

18. U član 110. Statuta Univerziteta u Sarajevu vrši se izmjena i dopuna na način da se stav (1) dopunjuje i sada glasi:

„Vijeće naučnoistraživačkog instituta je najviše naučno i stručno tijelo instituta kao članice i čine ga članovi u skladu sa Zakonom o naučnoistraživačkoj djelatnosti.“

Dosadašnji stavovi (2), (3) i (4) se brišu.

19. U stavu (5) člana 125. Statuta Univerziteta u Sarajevu, u cilju harmonizacije naziva općih akata Univerziteta iz oblasti rada, predlaže se *izmjena* naziva općeg akata na način da se naziv „Pravilnik o radu“ zamjenjuje sa novim nazivom „Pravilnik o unutrašnjoj organizaciji i sistematizaciji radnih mjesta“ i stav (5) sada glasi:

„(5) Prava i dužnosti sekretara preciznije se uređuju pravilnikom unutrašnjoj organizaciji i sistematizaciji radnih mjesta članice u skladu sa važećim propisima.“

20. U stavu (4) člana 130. Statuta Univerziteta u Sarajevu iza riječi „Pravilnikom o korištenju vlastitih prihoda Univerziteta u Sarajevu“ dodaju se riječi „Pravilnikom o upravljanju projektima na Univerzitetu u Sarajevu“ i ovaj stav sada glasi:

„(4) Prihodi iz stava (2) ovog člana koriste se u skladu sa Statutom, Pravilnikom o finansijskom poslovanju Univerziteta u Sarajevu, Pravilnikom o korištenju vlastitih prihoda Univerziteta u Sarajevu, Pravilnikom o upravljanju projektima na Univerzitetu u Sarajevu, potpisanim sporazumima i ugovorima između Univerziteta i finansijera programa, projekta i donacije, odobrenim budžetom, pravilima i uvjetima finansijera projekta/programa, kao i drugim općim aktima Univerziteta.“

21. U dijelu petom Statuta Univerziteta u Sarajevu kojim se regulira poslovanje, budžet, imovina i finansiranje Univerziteta sa ciljem nomotehničkog usklađivanja predlaže se promjena redoslijeda dosadašnjih članova Statuta Univerziteta u Sarajevu na način da nakon dosadašnjeg člana 137. (Odgovornost za izvršenje finansijskog plana/budžeta) slijedi dosadašnji član 139. (PDV – porez na dodanu vrijednost) koji postaje član 138. Dok dosadašnji član 138. (Imovina i odgovornost za obaveze Univerziteta/članica) postaje član 139.

22. U članu 141. Statuta Univerziteta u Sarajevu u stavu (1) predlaže se dopuna na način da ovaj stav sada glasi:

„(1) Upravni odbor dužan je Vladi odnosno Skupštini podnijeti godišnji izvještaj o radu sa finansijskim poslovanjem Univerziteta u Sarajevu, sa obaveznim elementima koje utvrdi Upravni odbor.“

23. U stavu (2) člana 162. Statuta Univerziteta u Sarajevu predlaže se izmjena na način da se riječi „studijskog programa“ zamjenjuje riječju „članica“ i ovaj stav sada glasi:

„(2) Studijski programi podliježu internoj evaluaciji vijeća članice nakon provedenog jednog ciklusa studija.“

U nastavku, uvažavajući organizacionu strukturu Univerziteta i izvođenje studijskih programa putem podorganizacionih jedinica (centara) Univerziteta, predlaže se dopuna novog stava na način da se nakon stava (2) dodaje se novi stav (3) koji glasi:

„(2) Studijski programi podliježu internoj evaluaciji vijeća podorganizacione jedinice Univerziteta nakon provedenog jednog ciklusa studija.“

24. U stava (2) člana 230. Statuta Univerziteta u Sarajevu, kojim se reguliraju uvjeti pod kojima dolazi do produženja radnog odnosa akademskog osoblja sa navršenih 65 godina života neophodno je iste uskladiti sa članom 135. Zakona, na način da se vrši izmjena dosadašnjeg stava (2) i sada glasi:

„(2) Ukoliko postoji iskazana nastavna potreba, članu akademskog osoblja u zvanju redovnog profesora produžiti će se radni odnos najduže za dvije akademske godine, pod sljedećim uvjetima:

- a) za redovnog profesora u naučno-nastavnom zvanju da je u posljednjih sedam godina objavio tri naučna rada u publikacijama u relevantnim naučnim bazama ili jednu knjigu ili bio rukovodilac projekta, kao i demonstrirao izuzetnu sposobnost i doprinos procesu internacionalizacije i društveni doprinos iz člana 112. stav (3) tač. b) i c) Zakona,
- b) za redovnog profesora u umjetničko-nastavnom zvanju da je posljednjih sedam godina realizirao javno predstavljene oblike umjetničkog stvaralaštva koji znatno doprinose razvoju kulture i umjetnosti ili podizanju umjetničkog kadra i uspjeh postignut za vrijeme mentorstva (solistički angažmani, uspjesi na natjecanjima i sl.).
- c) da je vijeće članice, na prijedlog odsjeka/katedre, donijelo odluku o potrebi produženja radnog odnosa.“

25. U članu 236. Statuta Univerziteta u Sarajevu, kojim se regulira oduzimanje akademskog/naučnoistraživačkog zvanja, neophodno je izvršiti usklađivanje, pri tome imajući u vidu da je *Poglavlje I. Postupak poništavanja i oglašavanja javne isprave nevažećom* vezano uz ovaj postupak.

„Član 236.

(Oduzimanje akademskog/naučnoistraživačkog zvanja)

Akademsko/naučnoistraživačka zvanja koja dodjeljuje Univerzitet mogu se oduzeti u slučaju:

- a) ako se utvrdi da postoje činjenice i dokazi iz kojih proizilazi da u trenutku izbora u akademsko/naučnoistraživačko zvanje kandidat nije ispunjavao uvjete za izbor odnosno da je izbor izvršen na osnovu netačnih, lažnih ili falsifikovanih činjenica,
- b) ako se utvrdi da je završni/magistarski/doktorski rad prisvojeno djelo (plagijat) odnosno krivotvoreno djelo i
- c) ako se utvrdi da u vrijeme odbrane završnog/magistarskog/doktorskog rada nije stečeno pravo na odbranu.“

26. U stavu (3) člana 254. Statuta Univerziteta u Sarajevu neophodno je izvršiti usklađivanje rokova u radu Komisije za pripremanje prijedloga za izbor sa odredbom člana 234. Statuta Univerziteta u Sarajevu, na način da se odredi rok od 30 dana i ovaj stav sada glasi:

„(3) Komisija je obavezna izvještaj sa prijedlogom za izbor u zvanje dostaviti vijeću, u pravilu, u roku od 30 dana od datuma imenovanja.“

27. U članu 259. Statuta Univerziteta u Sarajevu, kojim se reguliraju tijela nadležna za pitanja akademske etike, predlaže se dopuna novog stava (2) koji glasi:

„(2) Univerzitet može uspostaviti ombudsmena u cilju zaštite određenih prava osoblja Univerziteta/članice i osiguranja djelotvornih procedura koje se odvijaju na Univerzitetu/članici.“

Dosadašnji stav (2) postaje stav (3), dopunjuje se i glasi:

„(3) Način rada i postupak formiranja tijela iz stava (1) i (2) ovog člana preciznije će se urediti općim aktom Univerziteta.“

28. U stavu (1) člana 266. Statuta Univerziteta u Sarajevu predlaže se izmjena tačke e) na način da ista sada glasi:

„e) veći broj objavljenih knjiga ili naučnih radova ili projekta od značaja za struku i nauku, vodeći računa da neko od djela mora biti publicirano u periodu ne dužem od sedam godina od dana podnošenja zahtjeva za dodjelu počasnog zvanja profesora emeritusa, odnosno veći broj javno predstavljenih umjetničkih radova od značaja.“

29. Predlaže se promjena redoslijeda poglavlja Statuta Univerziteta u Sarajevu u dijelu desetom kojim se uređuje *Dokumentacija, evidencija i javne isprave* na način da dosadašnje *POGLAVLJE I. Postupak poništavanja i oglašavanja javne isprave nevažećom* postaje *POGLAVLJE II. Dok s druge strane POGLAVLJE II. PRIZNAVANJE I EKVIVALENCIJA VISOKOŠKOLSKIH KVALIFIKACIJA* postaje *POGLAVLJE I.*

30. U stavu (2) člana 279. Statuta Univerziteta u Sarajevu predlaže se *brisanje* tačke c) koja glasi „c) ako se utvrdi da završni rad nije originalni rezultat samostalnog rada kandidata, odnosno da je pojedine dijelove rada ili rad u cijelosti izradilo drugo lice.“

U nastavku predlaže se dopuna člana 279. Statuta Univerziteta u Sarajevu na način da se nakon stava (2) dodaje novi stav (3) koji glasi:

„(3) Ako se utvrdi da završni rad nije originalni rezultat samostalnog rada kandidata Univerzitet ima pravo poništiti i oglasiti javnu ispravu nevažećom.“

31. U stavu (5) člana 282. Statuta Univerziteta u Sarajevu vezujući se za ostvarivanje prava na djelotvoran pravni lijek predlaže se *dopuna* na način da se precizira o kojem sporu je riječ i ovaj stav sada glasi:

“(5) Odluka iz stava (4) ovog člana je konačna, a protiv iste se može pokrenuti upravni spor kod nadležnog kantonalnog suda.“

U nastavku, nakon stava (5) predlaže se dopuna novog stava (6) koji glasi:

„(6) Osoba kojoj je poništena i oglašena nevažećom javna isprava gubi sva prava koja je stekla na temelju takve isprave.“

Dosadašnji stav (6) postaje stav (7).

32. U člana 285. Statuta Univerziteta u Sarajevu predlaže izmjena dosadašnjeg stava (2) na način da isti sada glasi:

„(2) Statut Univerziteta donosi Senat dvotrećinskom većinom od ukupnog broja članova Senata, uz prethodno pozitivno mišljenje Upravnog odbora Univerziteta i ocjene Ministarstva o saglasnosti Statuta Univerziteta sa zakonom.

33. U članu 286. Statuta Univerziteta u Sarajevu nakon stava (3) predlaže se dopuna novog stava (4) i novog stava (5) koji glase:

„(4) Opći akt članice je Pravilnik o unutrašnjoj organizaciji i sistematizaciji radnih mjesta članice.

(5) Članice Univerziteta mogu donositi opće akte uz prethodnu saglasnost Upravnog odbora o njihovoj usklađenosti sa općima aktima Univerziteta.“

34. U članu 296. Statuta Univerziteta u Sarajevu kojim se regulira prestanak važenja ranijeg Statuta s ciljem mnemotehničkog usklađivanja odredbi predlaže dopuna na način da se precizno navedu sve dosadašnje izmjene i dopune Statuta Univerziteta u Sarajevu br. 01-1093-3-1/18 od 28. 11. 2018. godine. Dopunjena odredba ovog člana sada glasi:

„Stupanjem na snagu ovog Statuta prestaje važiti Statut Univerziteta u Sarajevu broj: 01-1093-3-1/18 od 28. 11. 2018. godine sa pratećim izmjenama i dopunama broj: 01-21/19 od 28. 06. 2019. godine, 01-3-96/20 od 26. 02. 2020. godine, broj: 01-1-31/21 od 27. 01. 2021. godine i broj: 01-8-2/21 od 26. 05. 2021. godine.“



**PREDSJEDNIK
UPRAVNOG ODBORA**

Dr. sc. Murat Ramadanović

Dostaviti:

- ① Senatu
- Rektor
- Ministarstvu za obrazovanje, nauku i mlade Kantona Sarajevo, putem Senata
- Predsjedniku i članovima Upravnog odbora
- Generalnom sekretaru
- U dokumentaciju Upravnog odbora
- Arhivi

Univerzitet u Sarajevu – Obala Kulina bana 7/II, 71000 Sarajevo – Bosna i Hercegovina

Telefon: ++387(33)226-378; ++387(33)668-250 - fax: ++387(33)226-379

<http://www.unsa.ba>

[email: javnost@unsa.ba](mailto:javnost@unsa.ba)